

Nagina arma per l'assistenza da polizia

Il servetsch cun arma resta en ils mauns da la polizia

■ **(anr/ac) Il cussegl grond è suandà il mardi passà l'opiniun da la regenza ed ha renvià l'incumbensa dal deputà Michael Pfäffli (pld, Engiadin'Ota) per stgaffir la basa legala per armar assistentas u assistents da polizia.** «Nus na vulain betg quai ed ils chantuns da la Svizra orientala na vulan medemamain betg quai.» Il cusseglier guvernativ *Christian Rathgeb* ha intimà il cussegl grond da renviar l'incumbensa dal deputà *Michael Pfäffli*. Ed il cussegl ha dà suatientscha al giavisch guvernamental cun 71 cunter 43 vuschs e sutterà uschia il garegiament dal deputà da l'Engiadin'Ota e ses consegnaders. Pfäffli aveva numnadamain stipulà en ina incumbensa l'incarica da stgaffir la pussaivladad da lubir l'armaziun dad assistentas ed assistents da polizia. E quai entaifer la revisiun parziala da la lescha da polizia dal chantun Grischun empermesa per l'onn 2018 cun ina adattaziun da la ordinaziun. Il deputà ha fatg attent als novs basegns da segirezza da la populaziun principalmain en ils centers urbans. Ed el ha menziunà las experienzas positivas fatgas en auters chantuns cun assistentas ed assistents da polizia armads. L'in-

cumbensa ha procurà per ina viva discussiun en il cussegl grond il mardi passà. Ella n'ha dentant betg pudì persvader il cusseglier guvernativ Rathgeb. El ha accentuà avant il cussegl grond l'opiniun da la regenza grischuna e quella dal concordat da polizia dals chantuns da la Svizra orientala. Per Rathgeb è il servetsch a l'arma ina sparta fitg sensibla che duai tenor ses avis restar en incumbensa da la polizia. La scolaziun dad assistentas ed assistents da polizia saja memia rudimentara per lubir l'armaziun da la assistenza da polizia. Ils chantuns che furman il concordat da polizia da la Svizra orientala vulan augmentar la furmaziun da policistas e policists gist era pertutgant il diever da l'arma. Era porschia il chantun Grischun memia paucas incumbensas che pudesian vegnir delegadas a l'assistenza da polizia armada, ha fatg a savair Rathgeb. Enfin uss enconuschan sulet sis chantuns assistenza da polizia armada. Dad in trend en direcziun da l'assistenza da polizia armada n'ha il cusseglier guvernativ betg pudì pledar. Consequentamain è il cussegl grond suandà la proposta da la regenza ed ha renvià l'incumbensa.